

民國肇縣志

鞏縣志卷十二

邑人

劉蓮青

張仲友

邑人劉鎮華鑒定

邑人劉鎮海參閱

固始萬自逸讐校

人物志上

後漢之末士風最昌太學諸生至三萬餘人皆天下之英異也爰舉其生平所效慕者加之稱號上曰三君次曰八俊次曰八顧次曰八及次曰八廚而尹勳在八顧顧者言其能以德行引人者也此誠足以高視乎千古

而為邑乘之光矣嗣是而降代有其人凡學士澤躬訓世武夫擐甲衛鄉官吏慈善愛民下至委巷編氓或孝友於其家或慷慨以濟眾或以才能藝術信今而傳後皆不容遺佚者也用是次其時代原其世系以志人物

周

程本

本

一作木子

春秋晉人博學善持論聚徒著書自號程子名稱

聞於諸侯時趙簡子為政欲致之遠巡不肯起去而之齊

館於晏氏更稱子華子孔子之郊嘗遇於塗傾蓋與語後

年老歸晉不復仕著書名子華子劉向校定

據己酉志引文獻通考家

語纂

按鞏縣舊志有子華子故里及其墓其地實近虎牢當
春秋晉城虎牢後已入晉迨三晉分地又入韓故國策
以韓有城皋鞏洛之險是時鞏地實半入韓也

戰國

齊明 周最

明戰國時東周人後事秦楚及韓與周最樓緩之徒合從

締交最鞏人

據人名大辭典暨已酉志引史記注纂

漢

田真 弟 廣 慶

真廣慶三田孝友之名傳播里耳幾於婦孺皆曉至分紫
荆一節委曲湊合故神其事或可借以勵末俗殊難見稱
於大雅相傳係縣西孝義人該處有三田宅三田墓三田
井併謂里名卽由是起舊志列孝義門中今仍之

據己酉
志纂

尹勳

勳字伯元鞏人伯父睦爲司徒兄頌爲太尉宗族多居貴
位者而勳獨持清操不以地勢尙人州郡連辟察孝廉三
遷邯鄲令政有異迹後舉高第五遷尙書令及桓帝誅大
將軍梁冀勳參建大謀封都鄉侯遷汝南太守上書解釋
范滂袁忠等黨議禁錮尋徵拜將作大匠轉大司農坐竇

武等事下獄自殺已酉志引後漢書

按已酉志據後漢書黨錮傳而劉瑜傳亦附有尹勳傳畧有不同劉瑜傳云大將軍竇武欲大誅宦官乃引瑜爲侍中又以侍中尹勳爲尙書令共同謀畫及武敗瑜勳並被誅勳字伯元河南人從祖睦爲太尉睦孫頌爲司徒勳爲人剛毅直方少時每讀書得忠臣義士之事未嘗不投書而仰歎自以行不合於當時不應州郡公府禮命桓帝時以有道徵四遷尙書令延熹中誅大將軍梁冀帝召勳部分衆職甚有方畧封宜陽鄉侯僕射霍諝尙書張敬歐陽參李偉虞放周永並封亭侯勳後

再遷至九卿以病免拜爲侍中八年中常侍具瑗左悺
等有罪免奪封邑因黜勳等爵又黨錮傳序尹勳在八
顧顧者言能以德行引人者也又桓帝紀勳等七人爲
亭侯兩傳云鄉侯互異

晉

嵇含

含字君道祖喜徐州刺史父蕃太子舍人好學能文家在
鞏縣亳邱自號亳邱子門曰歸厚之門室曰慎終之室齊
王冏表爲征西參軍封武鄉侯性通敏好薦達賢才後劉
宏表爲平越中郎將爲郭勸所害懷帝謚曰憲著有南方

草木狀據已酉志引

晉書本傳纂

北魏

張孟舒子宗之鸞旗

孟舒從劉裕西征假洛陽令初緱氏宗文邕聚黨於伊闕謀反逼脅孟舒等文邕敗孟舒走元魏子宗之被執入京充腐刑及宗之貴幸高宗累贈孟舒平南將軍洛州刺史

鞏侯謚曰貞據已酉志引魏書纂

宗之字益本鞏人家世寒微因父孟舒從宗文邕被執入京充腐刑以忠厚謹慎擢為御史中散賜爵鞏縣侯尚書領中秘書進爵彭城公出為散騎常侍寧西將軍東雍州

刺史以在官有稱入爲內都大官出除散騎常侍鎮東將

軍冀州刺史又例降爲侯太和二十年卒年六十九贈建

節將軍懷州刺史謚曰敬

節錄已酉志引魏書本傳

鸞旗宗之兄官中書侍郎東宮庶子兼宿衛給事加寧遠

將軍賜爵洛陽男轉殿中給事常侍卒贈洛州刺史謚曰

靖

已酉志引魏書

唐

劉允濟

允濟字允濟河南鞏人其先出沛國齊彭城郡丞瓛六世

孫少孤事母尤孝工文辭與王勃齊名舉進士補下邳尉

累遷著作佐郎采魯哀公後十二世接戰國爲魯後春秋
獻之遷左史兼直宏文館武后明堂成奏賦述功德手詔
褒答除著作郎爲來俊臣飛構當死以母老丐餘年繫獄
會赦免貶大庾尉復爲著作佐郎修國史常曰史官善惡
必書使驕主賊臣懼此權豈輕哉而班生愛金陳壽求米
僕乃視如浮雲耳遷鳳閣舍人坐二張暉狎除青州長史
有清白聲巡察使路敬潛言狀以內憂去官服除召爲修
文館學士旣久斥喜甚與家人樂飲數日卒

己酉志引唐
書文藝傳

杜審言 子并孫甫

審言父依藝爲鞏令遂家於鞏審言雅善五言詩工書翰

惟恃才蹇傲甚爲時輩所嫉舉進士累轉至吉州司戶參
軍州司馬周季重與員外司戶郭若訥共構審言罪狀繫
獄將因事殺之審言子并年十三并傳作十六懷刃入府中擊

之季重中傷死而并亦爲左右所殺士友哀并孝烈蘇頌
爲撰墓志劉允濟爲作祭文審言坐此免官後屢蹶屢起

位終膳部員外郎有文集十卷事詳舊唐書據已酉志纂

并字惟兼審言長子生而聰敏有老成之量日誦萬言尤
精翰墨審言左遷吉州并隨赴官司馬周季重陷審言於
法幽繫之并年十六志憤形毀因公府宴集手刃季重於
座季重死并亦爲左右所殺仇怨已復神情無撓士大夫

表并孝烈蘇頌爲撰墓志長安二年四月十二日葬於建

春門東五里

據并墓志纂

按并墓志近年發現偃境撰書俱不署名書法秀勁可觀是否許國公手筆無從核考

甫字子美本襄陽人曾祖依藝終鞏令遂家焉祖審言位終膳部員外郎別有傳父閑終奉天令甫少賦奇才值天寶之亂崎嶇戎馬鋒燧閒迭經玄宗授兵曹參軍肅宗拜右拾遺所至齟齬不遂與房琯嚴武友善武曾奏爲工部員外郎武卒寂落寡合素工詩與隴西李白相頡頏陵轍古今世推之曰詩聖一生忠君愛國每飯不忘傲岸崩岌

之氣一形之於詩足迹所歷幾徧關蜀又復下巫峽浮荆楚泝沅湘卒於耒陽年五十九伊古遭遇之困未有若甫之甚者著有工部詩集十六卷事詳唐書本傳據已酉志引舊唐書

五代

李雄

雄能詩莊宗同光甲申歲遊金陵成都鄴下各為詠古詩

三十章以三國鼎峙名鼎國詩已酉志

宋

蔡齊

齊字子思鞏縣人見河南通志餘詳宋史本傳據己酉志纂

張堯封 兄堯佐 從子山甫

堯封河南永安人温成皇后父也父穎由進士終建平令

堯封孝謹好學登進士為石州推官早卒追封中書令清

河郡王謚景思 據温成皇后傳纂

堯佐温成皇后世父舉進士筠州推官吉州有道士與商

人夜飲商人暴卒道士逃為羅者所獲捕繫百餘人轉運

使令覆治得其寃改大理寺丞知汜水縣復遷殿中丞知

犀浦縣因地狹民繁多田訟堯佐為正其疆界條眾弊以

曉之訟遂簡擢知開州時温成方為修媛欲以門閥自表

異故堯佐稍進用知開封加龍圖閣直學士給事中端明
殿學士諫官包拯等言不宜驟用改戶部侍郎尋兼淮康
軍節度宣徽南院景靈宮四使又賜二子進士出身吳奎
等復以爲言堯佐辭宣徽景靈二使以宣徽使判河陽從
鎮天平軍卒贈太師堯佐初起寒士持身謹畏頗通吏治
曉法律子山甫引進副使樞密副都承旨后父堯封幼從
學稽穎所爲文多留穎家後令堯佐詣穎求編次其稿爲
序以獻穎不答亦不以獻

己酉志

金

盧亞

亞舊府志芝田人嘗讀書於緱山正大中舉進士第一據

酉志

纂祭

按緱山舊隸永安金改永安為芝田今鞏芝田鎮有盧亞狀元坊其故宅在今芝田西北訾店

元

張恩子思敬 思信 思忠孫毅曾孫惟敏 惟賢

玄孫 禎 裕

恩其先解人後家鞏遂為鞏人金季為嵩州安撫使以讜論與達官齟齬勇退家居至元間授鞏令有仁政人號張佛以孫貴贈嘉議大夫禮部尙書上輕車尉追封清河郡

侯長子思敬次子思信三子思忠

據己酉志纂

思敬初襲尹鞏改蒞鄆陵沁水洛陽大名鄒平凡六縣陞江陵總管府判官知均州醴陵州揚州路總管皆以善治顯大名歲饑輒發廩以賑敬謂同列曰救饑如解倒懸若需郡報則道其殫矣苟以專擅獲戾吾其獨坐先是江陵水漲則漂沒瀕江廬舍迺急築防完而水大至民免於

昏墊鄆陵文獻志入宦蹟

據己酉志暨鄆陵志纂

思信元末以百夫長從征蜀攻釣魚山冒矢石陷陣授忠翊校尉攻襄陽擐甲先登墜而復上者三矢貫甲中股竟執俘以還遷昭信校尉佩金符管軍上千戶

據己酉志纂

思忠字誠之仕至嵩州司竹官不樂爲苛征棄去卽不復
仕性孝友親疾晝夜不解帶其兄從軍襄樊三月書不達
二親憂之公徒步至兵間不避鋒鏑卒獲安耗歸寧其親
一日謂其兄弟曰古人有十世共爨者今何爲不然得非
俗之不古與兄弟感其言不敢謀析處鄉鄰族尙多所周
卹以子毅爲中書參議贈集賢直學士大中大夫上輕車
都尉封清河郡侯長子毅據己酉志纂
毅字彥宏寺灣人爲績溪尹累官至江浙參政偉器雅望
歷踐華貴爲時名卿引年閒居福壽鼎盛至正間贈推誠
翊正贊理功臣奉政大夫河南江北等處行中書省參知

政事護軍追封河南邵公謚忠肅又大德中毅爲績溪尹
歲饑勸富民分賑復置義倉儲粟有飛蝗蔽空羣虎入境
禱於忠烈廟是夕大風雨蝗盡滅又有猛獸如彪逐虎食
之民立石以記子惟敏惟賢

據己酉志纂

惟敏字孟功泰定間以儒官補集賢院掾吏累官至河南
江北等處行中書省參知政事後封梁郡公謚文定長子

禎三子裕

據己酉志纂

惟賢字仲容有文名工詩辟掾禮部早卒御史宋璠爲作

張才子傳崇祀鄉賢

據己酉志纂

禎字元伯由國子生補侍儀舍人授淮南路知事郎中江

南行御史臺掾史授將仕郎江南湖北道肅政廉訪使知
事丁父文定公憂制終授河東山西廉訪使知事授承事
郎工部司程勅授刑部員外郎轉中書工部員外轉奉訓
大夫中書左司員外郎年七十告終至正十七年上十禍
書詞旨切要其畧曰輕大臣也解權綱也事安逸也杜言
路也離人心也濫刑罰也此六者根本之禍也不慎調度
也不資羣策也不明賞罰也不選將帥也此四者征討之
禍也節畧因徇治安不預防慮今天道變常民情難保正
當修實德以答天意推至誠以回人心凡土木聲色晏安
鳩毒皆宜痛撤勇改迺泰然處之若承平無事此事安逸

所以爲根本之禍也自四方齊驚調兵六年初無紀律又
失激勸將相因敗爲功指虛爲實大小相瞞邀功求賞是
以有覆兵之將有殘民之將貪婪怯懦曾無懲戒所經之
處雞犬一空而反以克復受賞今河南所存不過三四縣
江淮千里蕭條而望軍旅不乏餽餉不絕使天雨粟地湧
金朝夕且不保況以地力有限之產而供將帥無窮之欲
哉陛下事佛求福飯僧消災今天下兵起殺人不知其數
泰然不理而曰吾將以是求福禱何自而至哉穎上之兵
駸駸可畏不至亡吾社稷不止此不明賞罰所以爲征討
之禍也惜奏疏不省執政忌之出爲山南僉事

據梁郡
族譜纂

裕字康伯由御史臺知班歷官左丞相元末順帝北去踰
日徐達陳兵齊化門填壕登城時康伯爲監國右丞相不
降斬之全家盡節妻韓氏贈梁郡夫人子師常國學生已

齊志

纂

曹鐸

鐸洛口人山東道宣慰副使轉雁門關三邊總督至元十

四年詔贈譙國公

據已酉志纂

明

魏敏

敏字好學洪武戊辰進士授吏科給事申以母病謁告歸

省未至而母卒歟卽之墓所哀痛水漿不入口者五日

墓三年且夕衰服哭奠如初喪鄉里稱其孝洪武二十六

年以守臣請旌其門

據己酉志纂

張祺 康寧

祺博通經史精法律為人醇厚端確洪武二十八年與同

邑康寧皆以才德舉祺授廣東參政寧授監察御史

據己酉志纂

趙璠 子迎

璠稍柴務人任慶陽府推官為人剛正歷任嚴明不悅於

小人挂冠歸時以清白吏稱子迎

據明志纂

迎嘉靖丙戌進士累官兵備僉事所在稱職少時讀書青
龍山之慈雲寺晨夕苦攻博通典墳尤精易數斷驗如神
著範圍數二卷收入四庫全書生平喜吟咏詩文已散佚
惟慈雲寺題壁石刻尙存

據己酉志纂

范浩 崔遇

浩成化辛卯舉人穎敏博學士類敬服遇字六合白沙人
博學能文宏治辛酉舉人後任審理

據己酉志纂

劉登 孫遜

登字升高黃治人進士仕行人轉戶部員外郎以苗疆不
靖奉命持節鎮守交趾代尙書黃福行節鉞事南土率服

陞參議總督糧儲自陳致仕年九十二卒孫遜字與謙壬子舉人授兵部司務以廉勤著調吏部又補都察院司務守官蒞事惟謹惟勤祖孫俱祀鄉賢

據己酉志纂

王咨相

咨相任襄陽府推官志尙清潔優於折獄卒於官囊橐蕭

然明志

竇祥

祥字文瑞成化辛丑進士知安邑縣政成拜貴州道御史

遇事敢言卒祀鄉賢

己酉志

馬隆

隆字世昌神堤人成化己丑進士初任桐廬令擢御史巡視直隸遼東功績茂著轉山西僉事擒白蓮教王銀等晉本司副使推舉提學士類一新年九十二卒祀鄉賢據己酉志纂

示容

容鞏縣人宣德中舉賢良任周府審理己酉志

張可久弟可舉

可久隆慶庚午舉人城內人任永年令一志政教民事修舉開闢漑田合邑利賴卒祀鄉賢弟可舉字揚宇知新安

縣事以循吏稱據己酉志纂

楊世法 子葉新曾孫 淑蔭

世法號慎庵西栗林村人學識淵博萬歷壬午舉人介直
不妄交歲辛丑揀選碭山知縣適丁內艱服闋再選合水
縣持法公平超擢平涼同知廉潔有守卓著政聲子葉新

據已酉志暨
采訪冊纂

葉新字無染號蓬壺嗜學攻苦文采斐然由恩貢任太平
府通判覈支收徵姦猾屬邑多盜嚴治斂迹尋陞寧羗州

知州 據已酉志暨
采訪冊纂

淑蔭字仲檳號藏洗歲貢生父琪枝廩生以能文著淑蔭
承先世教澤刻苦好學雅重倫紀師事嵩陽耿介才名彌

超士多歸之與知縣顏光昌契洽不時投贈詩篇年六旬

餘任臨穎訓導所著詩文有兔園集餘餘集更有居喪祭

文多首不遺總麻仁孝肫誠流露字裏行閒據己酉志暨采訪冊纂

李復啟兄復光 六世孫大鯤七世孫子希希兄子善

統

復光字重陽號嵩石迴郭鎮人溧陽主簿性寬厚賢愚皆

敬禮賙卹貧乏親疏共沐其澤壽及耄耋始終一德弟復

啟字重賢號安仁官序班宅心正大在職以剛方著人頌

烈丈夫復啟六世孫大鯤字丕振號陶溪文才俊逸善事

父兄為里黨推重以明經終七世孫子希兄早世嫂王氏

堅志節守兄子善統未離懷抱子希事孀撫孤恩義兼至
雍正十二年伊洛大漲災民寢處無地子希捐粟振濟雅
中丞彰善錄紀其事洎善統成立事孀母與叔父孝敬有
加母歿廬墓三年子希候選州同善統例貢生

據明志暨
己酉志采

訪纂

周儼

儼字敬儀城內人任中城兵馬指揮賜五品服因註誤左
遷潯州府推官在職廉明剛正旋陞知州地多煙瘴未幾
致仕子貴太平訓導孫道丙辰進士天長興化知縣

據明
志纂

杜森

森任州判立身剛介蒞民簡靜與僚友齟齬解綬歸所遺

俸精日與故舊徜徉為樂

據明志纂

王惟一 校玩

惟一任推官才具優裕政無苛刻在任九年因老歸田兄

弟友愛彌篤玩字思道蔡莊人由貢生授冠縣丞慈惠逮

下人稱校佛

據明志纂

曹鏗

鏗任檢校明法律優獄讞大吏嘉其能咸樂委用歷官九

載例當擢陞因薄宦情致政

據明志纂

康紹先 康紹光 康紹第 康世臣

紹先字繩武康店人由貢生任洪洞主簿轉內黃丞署內

黃滑二縣事歷官九載公正廉潔賢聲藉藉致仕歸黎民

攀道堅挽

據已酉志纂

紹光字誠

明志作誠

號印山康店人早歲流賊圍城父在

城酣醉乃負父逃行十餘里吐血數升又行十里父方醒

得免於難嘉靖己酉登鄉薦知昌黎縣因親老致仕卒祀

鄉賢

據已酉志纂

紹第字御皋康店人明嘉靖廩生值德州周泗令鞏慨舊

志燬棄文獻日淪召集諸生重事修輯令紹第主筆政領

袖志事不數月而告成至其學行事功無從稽核暫付闕

如采訪

世臣歲貢嘉靖閒任洪洞訓導束修不責寒素多感之洪洞錄

洪洞志

趙景星

景星字瑞卿蔡莊人萬歷庚子舉人力行孝友弟早卒撫

養孀孤里人賢之知獻嵐二縣多惠政祀鄉賢據己酉志纂

霍敏

敏洪武三年授昭信校尉四年征蜀抵瞿塘并征雲陽萬州重慶順慶保寧等處九年調沅州衛十年征思州靖州等處蠻洞十六年調平越衛右所後征大小麻哈等處父

信贈昭信校尉管軍百戶

據己酉志纂

張泰定

張本

泰定字靖延廩生邑東灘小河人崇正十二年大饑人相食盜賊四起李際遇雲擾登封結申張任三營爲羽翼土寇王升以衆應之聚至五千餘人邑令宋文瑞檄馬指揮協同魏典史捕之畏縮不前賊勢愈熾逼近城邑泰定率鄉勇白玉舉等明賞罰繕器械勵以忠孝遇賊於口頭村一鼓破之斬百餘人邑人張本復計誘之使木庫等夜半

斬升首賊黨遂平

據己酉志纂

張紅

紅字應南寺灣人明季仕遼陽參將功德在民刻像祀之

采訪

劉體成

體成起家行伍由軍功授山西大同府偏關營掌印守備

分鎮榆林堡五年安堵無事有鎮邊之功

據已酉志纂

陳國用

國用原名龍字君佐益家窩人由行伍出征有功授湖廣

興國營守備陞參將

錄已酉志

姚若時

族人

不顯子城

若時字揆夫號海虛居魯莊明季舉人任鳳陽通判分鎮

潁州嘗除鄰盜浪陶子民賴以寧丁艱歸值崇禎庚辰土寇李際遇倡亂若時同族人麟徵率眾禦之親冒矢石麟徵被重創寒破猶力戰不屈賊獲其弟剝心剝皮執若時迫之降若時瞋目曰我朝廷官豈屈賊耶大罵死時年七十三賊裂其尸家人馬連收其骸於海子池山中族諸生丕顯號振文亦死之子成字健侯諸生數請兵復仇謀洩被執罵賊死妻王氏亦投井死

據己酉志纂

姚麟徵 弟 鳳徵 族人 丕烈 丕振 涵

麟徵字瑞乙廩生居魯莊土寇李際遇據轅轅山魯莊適當賊衝縣令檄授練總上官授以督師銜命剿賊麟徵偕

姚若時姚涵等謀守寨與賊相持月餘值大雨外援不至
寨破麟徵猶率衆力戰賊獲其弟鳳徵碎剉之鳳徵字羽
白大罵至死其母投環死妻楊氏及妾三人俱投井死其
餘家口麟徵持刀先驅入井亦投井死時年五十一計同
時殉難者一百四十三人有司聞於朝贈麟徵教授立祠
奉祀廕其子丕烈丕振號興門麟徵族人均諸生因禦賊
搆難涵字養吾亦族人同守寨禦賊寨破同日死節

纂

據已
西志

李魚躍 趙發隆

崇禎末年寇盜滿地魚躍遇諸城南賊逼之降乃大罵賊

怒斫死於道旁發隆諸生杜門教授寇至或勸其少貶乃
叱曰平生以節義爲重今日豈可改操乎遂遇害魚躍子
騰采孫秩均諸生同時被重傷

據己酉志纂

張燦斗 韓山斗

明季流寇圍鞏燦斗山斗並協力守城山斗遙指賊大罵
城破被執投井死燦斗亦殉節燦斗增生山斗歲貢生

據己酉志纂

酉志纂

原魁光 杜三印

魁光邑人守東門三印縣役守西門城破魁光投南門井

中死三印自縊於樓上

據己酉志纂

劉君德

劉起鳳

君德邑人士寇至被執脅之降不從以刀恐之罵益厲賊怒碎其首德既遇害賊亦引去洛北人有識君德者收其屍得其囊中二百金悉以付其家是亦歲寒松柏也惜失姓名附記之起鳳神堤人以擊闖功世襲指揮

據已酉志采訪稿纂

喬作霖 路濟世

作霖邑人流寇破城作霖遇賊不屈被殺妻李氏抱屍哭亦被殺濟世堤東人明季廩生以剛正著稱李際遇倡亂威劫相從挺然不屈肆口唾罵賊逐之因自盡

據已酉志采訪稿纂

林長春

長春清易鎮人明季流賊肆虐劉洪勸陷虜中長春勇
入奮出脫洪勸於險身被重創裹束負之歸未幾卽歿
嗣洪勸以甥代子葬於清易鎮東陵采訪

按洪勸爲劉蘇村東祠二世鼻祖曾爲長春樹墓碑後
世子孫設位祠內歲時拜掃祭奠奕世不替

賀進

進字從先瑤嶺人明季諸生遭亂結寨自固爲流賊李際
遇所破進奔魯莊尋又被獲誘其降進叱曰頭可斷決
不爾從賊怒將殺之中有識進者佯曰予仇此獠甚深將
手刃而甘心乃乘隙脫之采訪

白蘊秀

蘊秀字仲顯黑石關人孝友敦行有膽畧七歲失怙事兄如父李自成寇鞏所居鄉被圍其兄先出蘊秀獨提長矛且戰且行當者辟易卒保其室走河朔寇去偕兄歸有世父死寇兄弟抱遺骸哭適寇邏騎還與戰久之寇不勝曳戈馳去乃徐覆壁土瘞焉立身方嚴而與人寬厚其子爲人欺不平蘊秀曰彼欺爾讓欺將自己苟相角誰其堪之黑石關沿洛水古道紆回有蹊逕獨弗由其子問故曰子羔子羽非乎行不由逕甯路也而舍旃子恩康熙丁卯舉人歸德府學訓導卒日訣其子無私屬惟曰慎本分勤耕

讀據中州先哲傳纂

趙成

成迴郭鎮人明太祖起兵以從龍功於洪武元年任錦衣鎮撫司指揮僉事甲子授階明威將軍永樂八年病終京師奉旨葬祭子四福真英忠襲指揮僉事據己酉志纂

趙紀子延亨孫允賓曾孫燧來孫乘龍

紀成之玄孫係三門遲之後生平力行善子延亨能繼其志歲饑輸粟千石振濟地方邑令申報準予建坊孫允賓事親孝謹樂善好施百一歲時舉鄉飲賓又十七年卒允賓子燧髫年卽純孝侍父疾夙夜不怠偶假寐聞呻吟聲

凱驚起泊父歿葬祭準禮不作佛事據己酉志纂

葉龍字御六歲貢生天才敏捷文不起草晚年格益醇終

奇不遇據己酉志纂

趙于客子朗孫賜琳 賜琨 賜珪曾孫發祥 發

朝 發育

于客成八世孫燧猶子明季賦役繁重族眾皆逃亡于客
隻身任之後兵亂亦避去及亂定逃出者次第歸里乘于
客不家瓜分其產于客歸置不較族人皆感泣舉鄉飲賓
子朗字明陽明季諸生流寇肆虐父染疾卧年十四負父
逃賊見其少釋之朗子三賜琳賜琨賜珪據己酉志纂

纂

發軔與仲兄發慮均拔貢生伯兄發祥字長其中經魁棣
萼競爽豔稱一時發軔學識優長邱軒昂任鞏時嘗延修

縣志

據己酉志纂

發育考授縣丞五歲時父病醫謂宜用地黃汁發育聞命
往因不識苗大哭耕者憐其幼為代採送歸據己酉志纂

趙作人

從弟

作相

子漢

從子

錦

總麻姪

持衡

作人字吉士成十一世孫係二門迪之後由迴郭鎮遷城
東屹嶢峪康熙戊子歲貢以孝友聞嗜學如炙為文古奧
知縣李延訓義學弟子多著錄成名選鄧州司訓卒年八

十二子漢諸生兩事繼母盡孝視從子如子衣履不少異

從弟作相 據已酉志纂

作相太學生天性孝友好拯人急從子錦兄弟析產後兄子失業錦復割田與之旅客七人阻雪資罄厚贖之行不以名告總麻姪持衡內閣供事官耿介面折人過一生好

施予貧者沾其澤老成服其直 據已酉志纂

李寅 曹俊英

寅歲貢生迴郭鎮人父母喪前後廬墓六年有白鶴來棲之感分巡僉事章商臣親禮其廬題請旌表後任衡水教諭天啟閒俊英廬父墓三載巡按邱經其墓羣鳥環繞不

去訪知之詣廬具禮爲之請旌

據己酉志纂

周一貢 曹清 張紀

一貢字國士號東溪羽林莊人清紀均原良保人親死皆廬墓一貢並廬繼母墓野居九年觀風使旌之

據己酉志纂

魏進忠

進忠字龍河周府引禮官樂善不倦歲饑輸粟千石振濟

地方邑令申報準予建坊

據己酉志纂

謝廷獻 邵良知

廷獻性恢廓好義明季盜起盡出家資普濟貧困且大修壁壘結寨自衛六年內耕桑不擾里人如戴二天良知築

寨避寇以保鄉閭寇來率眾下石屢擊賊退後寨破被執
身受十餘創推擲寨下越日避壽八十餘廷獻廩生良知

庠生

據己酉志纂

康宗文 蕭永祚

宗文母病刺股取血和藥進之病尋愈永祚祖母病禱神
祈身代病亦瘳永祚太學生喪葬一遵家禮宗文廩生

據己酉志纂

西志纂

白道 張賢

道篤實慈惠捐粟數百石施棺數百具人咸敬之公舉鄉
賓晚年德愈高賢成化二十年捐粟振貧知縣榮華旌其

義賢坊廓保人道石關保人字君由據明志纂

張良臣 馬玘

良臣嘗焚債券數百金修葺寺觀捐金造縣東七里水溝石橋玘亦捐資築市河石橋知府旌獎之良臣元忠肅公

裔玘神堤保人據明志纂

譚寶子堯俞 崔良臣弟 儒臣 愚臣

寶良臣等均孝義保人寶篤實寬厚利濟為懷嘗修石梁便行人施義塚瘞旅客助婚喪拯族黨子監生堯俞善繼親志父喪蔬食三年良臣弟兄天順閒捐粟千石振貧有

司奏請勅立碑旌義據明志纂

張綱

綱字振紀貢生成化時由安化令改任醴泉縣勤督邊餉

民不告勞先任華陰有去思碑

錄醴泉志

清

張宏基

孫

乾二

張其章

子

鶉

宏基神堤人歲貢績學能文任儀封訓導陞河陰教諭砥躬勵行化導有方兩邑士子沐其教澤風為一變而又周

卹孤寒河陰志列祀名宦孫乾二

據己酉志暨河陰志纂

乾二字見龍貌奇偉讀書目數行下為文若夙構年十五好劍術喜談兵多應變才年二十四下第歸土匪流寇迫

近戶闖民間結寨自備洛北十三寨推爲首領乾二素諳
韜畧經營佈置枕戈以待崇禎十三年流寇東竄奉巡撫
高檄禦之於黑石渡乾二躍馬挺矛從兩騎直突其陣連
搦數人賊辟易南出輜輳關闖賊西來不敢輕走成皋一
路懼乾二之扼其吭也當時河南賊以登封李際遇爲傑
魁洛水以南俱遭殘破乘勝薄鞏城乾二率衆與戰城南
五里堡大破之斬首數百級前後凡三十餘戰皆大捷先
是乾二爲鞏令閻某畫守禦策不用十六年鞏城陷十七
年李自成陷京師十月清入燕定鼎豫王多鐸率師南下
採人望授以偃師印務李際遇嗾其黨誣以黑石之役與

闖賊通後勤得實勅令回任順治三年授陝西鞏昌府通渭縣知縣履任五日涼州回變鞏昌所屬皆陷乾二戰守並施卒保危城大吏深器之欲特薦以竟其才詎遭忌者之日旋挂彈章巡按吳勘得實狀讒人罪謫而乾二已羈留閱寒暑矣自古賢才多厄何勝浩歎事後通民爲立生祠尸祝之八年下詔連徵堅卧不起輕舟蹇驢放浪洛浦以詩酒自娛自號洛浦散人著有博笑吟一卷據己酉志采訪稿纂其章字晴皋號芳楚神堤人乾隆乙酉舉人大挑一等掣籤湖北歷署京山竹溪知縣後任黃岡以年老致仕竹溪縣志載其理冤獄捕巨盜息爭訟修隄防諸善政雅善詩

古文辭同里劉潛極深贊美著述多不傳子鵠采訪

鵠字星岩諸生天才卓犖浸淫家學弱冠名噪望洛間既侍父於黃岡官署奠贄名宿見聞益宏中經父喪讀禮之餘搜討萬卷以瀉胸中之奇居常束身名教鞭辟近裏以自箴砭嘗撰切責語二百餘言揭諸座右其辭曰勿是己而非人務隱惡而揚善律已無妨過嚴責人且莫太刻敦行循理要對得衾影安命聽天須耐得貧賤拂我情而愠生皆緣見人之不是便是藏身不恕根苗如我意而喜見皆緣見我之無非便是行己不忠積漸禍福窮通有主之者中無所得最易爲境遇所移道德仁義誰任之者外有

香鼎元名 一 二 三 四 五 六 七 八 九 十 十一 十二 十三 十四 十五 十六 十七 十八 十九 二十 二十一 二十二 二十三 二十四 二十五 二十六 二十七 二十八 二十九 三十 三十一 三十二 三十三 三十四 三十五 三十六 三十七 三十八 三十九 四十 四十一 四十二 四十三 四十四 四十五 四十六 四十七 四十八 四十九 五十 五十一 五十二 五十三 五十四 五十五 五十六 五十七 五十八 五十九 六十 六十一 六十二 六十三 六十四 六十五 六十六 六十七 六十八 六十九 七十 七十一 七十二 七十三 七十四 七十五 七十六 七十七 七十八 七十九 八十 八十一 八十二 八十三 八十四 八十五 八十六 八十七 八十八 八十九 九十 九十一 九十二 九十三 九十四 九十五 九十六 九十七 九十八 九十九 一百

所營終難入聖賢之路子弟固多愚然不能以身教又何
取乎舌傲唇焦風俗固日薄然不能由我回又何貴乎愴
懷蒿日家庭原主恩先王所以不爲爾設鈇鉞而敬而無
失恭而有禮此外別無良方民物皆吾與聖人所以予爾
大責成而憂有終身患無一朝其閒自有妙用百瘡千孔
如何救醫暮鼓晨鐘尙自警醒又復徧遊燕趙吳楚轍迹
幾半天下退而支硯陝虢橐筆宋檜所值偉人奇蹟莫不
往復纏綿探源窮委一一寄之詠歌所著有聚古閣詩草
兩卷文多散佚

采訪

原鳳起

鳳起字巢閣貢生清初投陝西褒城縣草昧初啟兵戈旁

午倉庫空虛百方綜措著空一城賦以寄慨據己酉志纂

曹含雅子大先孫鵬翊曾孫鵬翔曾孫肅謨 肅諭

含雅字子素貢監生洛口人三事繼母肫誠曲順以忍讓

教其子讓田焚券善行尤多子大先貢生孝行素著任新

鄭訓導上官委辦河工以勤事死據己酉志纂

鵬翊字萬如父大先司訓新鄭奉檄辦河工館不戒於火

鵬翊衝烈焰蒙溼衣掖父出父以悸卒雍正丙午舉鄉試

第二補官廣東和平和故巖邑俗好鬪鵬翊為立鄉正

優禮儒紳啟牖訓導俗漸感化邑產鉤吻毒草捐俸買焚

其根種爲之絕縣民向恃煮鹽爲生因胥黨奪其利鹽產日絀民散爲盜乃請上官疏瀾湖口禁飭胥黨鹽產以盛民復舊業政暇喜爲文辭著有大中講議自適集尙友編存存詩草素善書畫片紙人皆珍愛卒於官子肅謨肅諭

據已酉

志纂

鵬翔字翰起乾隆甲子舉人與兄翊齊名性恬靜不與外事築廬東山下與生徒發明經傳奧義補臨海丞攝啟海關不名一錢上官器之任滿歸囊囊蕭然殘書數卷而已

據已酉

志纂

肅謨字念三歲貢生蜚聲藝苑著有印古堂文集肅諭字

遵三號慎堂乾隆己酉舉人少具俊才詩文陵駕一時意
不自足乃東走青齊北達幽燕所至賢豪倒屣青年執贄
者聯翩門下計客河閒洙南凡數載譽望日隆誅親壽母
之作爭以得肅諭文爲快九河原委考尤稱名篇晚歲司
鐸許州官紳契洽公私無閒著有慎堂遺稿梅花百詠據

酉志采
訪稿纂

馬大成

大成字韶九歲貢生乾隆初任禹州訓導州因過象搆衅
武生某憤毆象奴州牧欲罪之大成力爲解免禹人義之

據己酉
志纂

張越子鞏孫 檜榮

越字伯遜康熙乙酉舉人居城內家室蕭索能得父歡心

任陳州學正子鞏廩生孝事雙親為時所重邑有大興作

羣推領袖以子貴贈修職郎子檜榮據已酉志纂

檜榮乾隆庚午舉人由孟縣教諭陞郿縣知縣詰姦如神

有府役因緣為姦助訟詐財檜榮立柱揭報人服明決據已酉志纂

西志

孫之緒子祚隆孫 汝工 型堯曾孫 炳然玄孫 枝榮

之緒字克纘羅莊人明季歲貢幼時遠出負米賊奪於途

泣曰有母在寇憐稚子孝而還之年十五即渡大河北授

徒長子祚隆廩貢生以孝友稱從耿介張沐遊著饒蜜園

省心齋詩文集孫汝工型堯

據己酉志纂

汝工字帝垂師事上蔡張仲誠先生精研性理之學仲誠器重之以舉人任河內教諭九年告歸喜作詩以疏淪性靈為主著東園詩鈔二卷弟型堯增生皆年近九旬猶授

徒講學

據己酉志纂

炳然字文甫庠生事親孝操守凜然邑諸生嘗條舉其孝廉二十事於學憲事聞炳然力拒時論益重之

據己酉志纂

枝榮字于陽號大樸乾隆己亥舉人資稟超異多藏書以尚友古人為期學詩於偃師裴希純學古文於河朔張生

馨而又勵志經學下帷攻苦嗣交童二樹武虛谷所學益
遂乾隆己亥河郡知府施誠修府志聘志山川枝榮於山
經地志討論有素又躬歷窮巖絕壑詳察脈絡支派務求
翔實秉筆四年識解益擴與二樹交莫逆二樹爲之寫梅
并贈以詩有云愛君自具冰雪文繞紙塵氛亦何益更煩
索笑一題詩宛然坐我梅花國枝榮步韻酬唱一時豔之
己酉歲輩令李述武聘修邑志與湘潭張九鉞往返商推
於舊志多所糾正所著有周官傳春秋三傳摘句四書餘
論河南山川志周南古蹟考羅志劍經注疏青桐閣詩文

集子和坦邑庠生能象賢

采訪

姚爾申 從子 允修 曾孫 恩

爾申字岳生號希庵魯莊人廩生學以明心見性爲本恪
守先儒矩矱早年謁張仲誠於上蔡湯潛庵耿逸庵均契
賞之湯謂義理所見針芥不爽耿謂英卓自立獨能於書
冊中尋求大本爲人沈潛堅貞穎悟非凡家居二十餘年
攘斥佛老方守正學所著有日知錄嵩談錄芸窗手草潛
陽問答太極圖辨理學要旨詩文集共八卷藏於家從子
允修字明庵號怡陶太學生少從爾申學以敦品礪行爲
本母亡後寢臥父側三十餘年 據己酉志纂

恩字亦囂縣增生天性純篤簡靜寡言早失怙母患沈疴

遂絕意進取躬親供養十二年暇則博涉經史著書自娛

采訪

段爲章

爲章字古愚少隨父宦鞏遂卜居城南新溝以詩見知於分巡道張某聘入幕後辭去結茅盤谷東塢更其谷名曰

太和吟哦其中以樂餘年有太和老人詩稿惜陰草據己酉志

纂

趙國鼎

國鼎字玉鉉趙密人少入庠有神童之目既厭詞章毅然

有志於聖賢嘗探龜山夏峯操心說名其齋以自勵師事

嵩陽耿逸庵逸庵提攜之嘗援朱子語謂蔡季通老友不

當在弟子列又贊其能從敬字用功其學以求放心為始

以復性為歸疾革命子燂湯具衣冠沐浴而卒著有修學

錄論辨集暨語錄若干卷

據已酉志纂

孫又康

又康字雪亭廩生精韻學著韻補數卷雪亭詩一卷後入

魯山不歸其稿散佚

據已酉志纂

孫曰明

從子

作樞

從曾孫

夢松

曰明郡庠生工文章所授生多成材從子作樞歲貢生為
文簡潔出其門者有先正風作樞孫夢松事繼母以孝聞

亦歲貢

據已酉志纂

閻調鼎 閻際和

調鼎天資聰穎博極羣書幼喪母事父盡孝授徒鄉里躬

行實踐聞望蔚然際和篤志攻苦行己端方以才能擢署

汜水知縣勞心撫字士民謳頌調鼎際和皆歲貢

據已酉志纂

趙仲璉 子 磬

仲璉字歸璞堤東人增生嗜書史律已端嚴門內秩然學

者多宗之子磬字衍復夙生性簡靜遇事剛毅不撓讀書

務求真諦不尚聲輓卓然以扶綱常維風俗為己任內行

敦篤無朋常變

據已酉志 採訪稿纂

張獻錦

獻錦性孝友廬父母墓為弟獻繡取嗣撫若己子

據己酉志纂

謝栗 從兄 杰

栗字士材歲貢生焦灣人性聰敏為文醇正古茂年七十餘選尉氏訓導勤於課士著有半醒堂集與從兄杰齊名杰字士超雍正癸卯進士治深澤縣多惠政著有治深紀

畧人謂言稱其實

據己酉志纂

李思忠

思忠字盡臣年十四以背誦十三經入庠又三年學使命背諸經至爾雅正文及註疏盡卷不錯一字公驚歎贈十

三經註疏及全史拔置優等乾隆壬午魁其經棟發陝西

知縣未幾卒 據已酉志纂

劉百代 父銳孫裕新曾孫澧

百代字永傳居城內乾隆甲子舉人父銳增生字子健父

母病廢臥榻左右藥饌十餘年兄早歿事孀嫂極恭周貧

卹喪善行尤多百代生性孝友和易愷悌母病瀉有年藥

餌皆身自製跣步惟謹人有盤錯事一言冰釋為文清麗

兼工詩孫裕新 據已酉志纂

裕新字銘三乾隆丙午舉人少依庭訓弱冠登乙榜眷戀

庭闈不涉宦達想家不中資舌耕養親凡事稟命始行遇

挑選籤掣陝西懼違親故請改教職教諭項城平居與弟
裕元友愛甚篤早出遲歸則挑燈坐俟因事遠行卽愁從
中來及官項城手足睽隔情愫纏綿見於書翰者有如無
已乙亥冬卧病學署裕元供俸湯藥不假於人病革遺命
歛殯從約勿受賓朋賻贈櫬歸諸生遠送境外平生訓士
敦尙實行不汲汲於帖括嘗輯先賢嘉言手錄一編作士

林圭臬

采訪

漳字桃溪邑諸生寬大和易樂善不倦居城市無紛華習
且制節謹度俾內外秩然不紊見有訟關骨肉者苦口開
導以釋宿嫌族親婚葬無力者多仰給焉先是城廂士紳

公解員役有免應征徭例法久弊生逐漸冒濫貽害闔閭
日深滄弛負擔已久顧念李代桃僵事理失平乃約前此
免役者概復其舊弊遂革滄精醫術尤體郵寒素遇無力
服藥者特指藥室泐簿歲梢代償咸同閒匪亂頻仍滄率
家人裹糧避難同行有不給者不時接濟道光初朝廷開
特科以孝廉方正召天下知縣朱某舉滄應時稱爲得人

采訪詩

孫萬書

萬書字貢生天真爛漫詩文名一時嘗授徒家塾士子經
指畫燧俱有法度詩不留稿歿後但存白松詩多篇

據己
附志

纂

劉衷濬

衷濬歲貢生為文醇而能肆屢躋場屋授生徒多所成就
晚患重聽專力讀書嘗日不舉火而文境益進遠近就正
者引繩批根不少懈

據己酉志纂

劉鳳翥

弟

鳳翥

子

潛

曾孫

兆三

玄孫

麟瑞

鳳翥鳳翥雙河人兄弟友愛相砥以學翥布衣著樵麓集
獨廩生以端方見重士林喜研小學家禮近思錄諸書出
其門者率能敦品鳳翥子潛

據己酉志纂

潛字季含號草窗少承家學器宇不凡童年失恃居喪如

禮事繼母極得歡心同懷及從兄弟八人皆處之以恭友
遠祖居劉蘇村距所居較遠春秋必往省墓以爲常孝弟
之心出於天性非勉然也稍長嗜學如渴藏書數千卷莫
不手過丹黃遂以詩古文詞名河洛間旋補諸生遐邇慕
道敦品者恆執經習禮於其家其教人也若衆飲於河各
充其量彬彬然質有其文爲人作誌銘記序如其分而止
與人交和氣謙德久而益親至義有未當絲毫不容相假
邑令李慕其學行延董差局裨補良多嗣以遊客勢吏需
索不已喟然曰民不堪命矣遂辭去初訪馬時芳於鈞陽
一見如故交談論甚洽越三十年馬司鞏鐸甫下車寓書

致候潛往答禮自是來往甚殷商訂不絕及卒馬輿以詩
並稱其爲希庵嗣音著有草窗文集四卷草窗詩稿兩卷

采訪

兆三字象乾母魏早逝事繼母翟周篤成豐癸丑粵軍入
境鄉人奔避一空翟老且病堅不去無何軍隊至問胡不
避兆三以母老病對隊長嘉其孝揮衆去並豎矛於門示
戒母子得無恙子麟瑞亦戀親不肯去兆三喝之乃潛匿
牆外伺狀咸獲全

采訪

于秉文 郝爌

秉文爌均歲貢生堅苦好學門下多知名士秉文選臨漳

訓導不赴

據已酉志纂

武應中 張績

應中字陵源雍正己酉科舉人天性孝友端品力學長東

周書院有年成就衆多績張績人喜士人常建塾延師賜

郵貧無力者孫耀南領鄉薦

據已酉志纂

劉誨 張無黨

誨博學強識以文章知名後生經指授者悉有法度無黨

力學授徒惻怛無華植品砥行楷模一方誨廩生無黨字

中立號鼎峯乾隆壬申舉人寺灣人

據已酉志纂

杜生南

生南字召菱號宗川歲貢生神堤人教人重敦品論文重
理法尤加意寒峻著有制藝三才集晚年精痘疹著訂正
神應心書嘗資某遷葬祖棺未幾故墓淪水某深感之子
雲喬乙酉舉人

據己酉
志纂

趙季芳

子藁

季芳字子餘號元之稍柴務人順治辛卯亞元歲早出穀
麥千斛闢郵鄉里任鄆城教諭遷衛輝府訓導進士有方
子藁字二生歲貢生克繼父志叔母張氏節守代為養育
子孫見郭外遺骸概收瘞之

據己酉
志纂

康晉吉 張昱斗

晉吉昱斗生當明季干戈饑饉民無聊賴晉吉負母避亂
眾競渡河母落水急投河挽母幾同溺舟人共為昇出兄
早歿撫兄子成立不忍鄉人流徙散布積粟不責券昱斗
字礪南懷絲渡河易米途遇寇劫乞憐而釋之順治間以
貢生訓導柘城據已酉志纂

李嗣白 謝託子

嗣白倉西人幼失怙家貧負薪供母乘暇夜讀邑令表其
閭託子亦少孤事兄甚謹鄉里推重俱以明經終據已酉志纂

于乘龍 劉鴻誠

乘龍順治間遞送銀兩汜水以無驛糶卸乘龍訴請上官

送至汜水止於署前立石記事鴻誠居家孝友輕財樂輸
凡興築學宮書院城垣等無役不從知縣何旌其門乘龍
諸生鴻誠國子生

據已酉
志纂

劉王輔 謝樞

王輔墮地卽喪母及長孝養繼母友愛異母弟並迎養母
舅舅歿爲之斂葬歲歉蠲米賑饑雍正閒公舉農官恩授
正八品糧少喪雙親性篤厚遇庶母及弟惟謹撫猶子尤
懇到濟急救貧不吝不驕

據已酉
志纂

邵宏緒 于德榮

宏緒收偃師遺孤旣長爲之成室後其祖歿給貲使歸葬

德榮買偃民王姓爲僕繼稔其爲孤子毀券遣歸據己酉志纂

焦隆祚 焦克誠

隆祚耄而好學動循禮法爲鄉里推重克誠孝友性成努

力爲善不求人知隆祚增生克誠附貢俱堤東人據己酉志纂

徐文正子應庚次子應奎孫省

文正迴郭鎮人幼值歲饑負米禹州養親賊劫於中途文

正以實告憐而還之素精醫術遇尤貧者施丹並給米子

應庚孝友能文由副貢教諭西平士林翕然次子應奎父

病禱神祈身代病尋愈諸弟無室者罄囊資助孫省歲貢

士克嗣先業據己酉志纂

劉復泰 劉王心

復泰胸次浩曠喜濟人急遇疾病婚喪力為周全邑令旌

之王心篤孝友昆季同居終身不析饑

據已酉志纂

李昇雲 子煙孫 維城

昇雲孝親恭兄不以造次顛沛閒賙貧乏成後學雅負時

譽子煙繼志奉養晚年親日警尋復明孫維城諸生孝事

繼母年六十餘猶躬奉湯藥諸孫請代不許母歿撫弟尤

有恩

據已酉志纂

張星煇 子應甲

星煇字君亮清易鎮人吏員歲歉運糧千里外供親膳餘

以賜族黨子應甲太學生兄歿無子代爲取嗣及析箸與

產特優

據已酉志纂

孫士相子景舜

士相嗜行善耄而彌摯康熙歲饑出粟代完官逋並舍棺

給貧購地施道路後得農官壽九十六長男景舜繼志養

親親歿每對柩或瞻畫像則痛不可仰期年竟以毀卒

據已

西志纂

張三聘

三聘諸生性慈喜賜急施櫛捨衣行之有年

據已酉志纂

劉毓祿

毓祿黃治人家析箸廬舍在城因孺慕情殷隨母村居二十年晉賈七人病死具棺瘞之縣令修東門石橋助以巨

資據已酉志纂

姚允猷 姚紹德

允猷字顯之例貢生歲饑鄉人欲遷徙謀生猷惻然出粟救濟存活者衆曾鐫石記德於道左紹德侯山北人叔父困於歉歲自鬻莊以全之有趙姓窮無以存周濟至老不倦生年掩路斃尤多據已酉志纂

張盱子輝曾

盱性孝友親歿遇兄弟有過失輒於木主前引咎自責至

誠感人伯仲相戒棄小嫌子輝曾諸生亦以孝友聞

據己酉志纂

邢名世 董珪

名世珪均有拾金還主事名世係拾趙姓傭所遺重一鎰珪服賈虞城拾金百二十兩還後不受失主酬謝虞城令

旌以還金高義四字

據己酉志纂

孫衷蘭

衷蘭魯村人幼喪父事母婉順兄弟同居七十年及析爨蘭僅一子令與從孫輩三分之不為獨厚乾隆二年被舉

壽宮

據己酉志纂

喬見龍弟乘龍子吐鳳從子翰周

見龍郡庠生璜之子兒時卽知孝養聞人談溫清故事輒神采飛動以躬自任及父歿事大父備色養人皆謂璜有子見龍歿乘龍善事寡嫂撫姪吐鳳情誼殷拳宗族待以舉火者數十家吐鳳事叔父如父子翰周亦孝思不匱曾捐金修茶亭於張家船以利行旅鄉人名曰惠濟見龍諸生乘龍翰周國子生據已酉志纂

張印蕙子士衡

印蕙以醫濟人買曹姓地後曹窮困折券還之子士衡豁達類父同里周某因貧欲嫁其妻士衡慨然資助夫婦得

以完聚

據已酉志纂

尙藝 王朝重 孟澤場

雍正九年歲饑藝在南山口西窪煮粥賑濟北官莊橋圯
出重金補修朝重設茶棚以飲渴施藥餌以療疾居臨通
衢夏月水漲多方救護不使病涉澤場修橋黑石渡邑令
兩旌之

據已酉志纂

杜君錫 仇長禎

君錫太學生詩聖三十二代苗裔東站工部祠圯於水族
人典祀田修之君錫出金二百餘贖其田知縣梁義之長
禎原籍山西因久賈隸鞏李某負金二百餘長禎憐其困

慨焚其券 據己酉志纂

孟亮元 孫 輝宗

亮元字案若南河渡人學務實踐喜誦宋以來儒先書整
綱飭紀士林宗仰由舉人任鄭州學正孫輝宗字君實號
敬軒學宗洛閩植品砥行舉乾隆壬午鄉試以挑選教諭
郟城副學受武生某賄金半遺輝宗不受使者委金去乃
移施養濟院卒於官 據己酉志纂

張紹倫

紹倫康熙某年弟紹紀遭虎厄村農號叫莫敢近紹倫持
巨斧直前虎咆哮迎倫倫竟劈其首虎仆衆舉鍤斃之乃

免於危

據己酉志纂

王修身

修身附貢生事親委曲盡致一日不在側親即不怡奉兄

尤謹飲食出入無敢先性慈善鄰里婚喪不給者量力助

之嘗施義地一區以便貧無葬者

據己酉志纂

徐士玠

子洛南

士玠敦宗睦族有太高叔祖居偃師乏嗣四世厝淺士士

玠為返葬舊域近族貧無室者助之婚娶以子洛南貴贈

修職郎洛南訓導陝州歸後陝人思慕

據己酉志纂

馬騷

子

懋生

懋才

懋林

曾孫

夢錫

敷錫

縣諸生迴郭鎮人孝以事親謙以處鄉歲荒出粟賑貸親族多沾其惠長子懋生亦諸生資性純樸以孝友端莊稱鄉里遇橫逆忍讓置之次子懋才貢太學篤孝友獨荷家事令兄專力硯田弟懋林幼善撫之後弟亦貢成均而懋才早世懋林視兄子如子懋才孫夢魁雲同雲榜皆齒覺序懋生子溫增生孫夢錫敷錫

據己酉志纂

敷錫字範九與伯兄夢錫副貢同舉乾隆丙午鄉榜任遂

平教諭家世讀書人爭濯磨敷錫才學優長以文章著聲

大挑一等例知縣事乃請改教職訓導通許卒於任所士

子佩其教澤送歸里第

據己酉志纂

香果三卷一
張怵弟懷 曹從周

怵字怡庵事繼母無閒言母歿未及葬夏月洛漲宅中水深數尺怵撫棺號痛自夜達旦卒獲無恙從周八陵人幼喪雙親每食必奠繼以哭仲父歿未葬室不戒於火從周奮足衝烈焰入竟移柩出怵弟懷從怵受業同卧起者二十年嘗授徒錦陽造就多士以貢生選汝寧府訓導卒於

官據已酉志纂

李中官 張人賢

中官恬淡孝友端已不干外事里巷高之人賢植品表率一方數十年不履城市鄉人頌其剛正中官人賢均諸生

據己酉

志纂

崔徵珣 張秉正 曹啟新

徵珣秉正好拯人急年荒出粟振濟鄉里而祇父恭兄倫

敘秩然啟新尤善事繼慈每歲置糶霑丐窮檐子孫踵續

以為常啟新太學生秉正增廣生子漢如江如孫毓麟俱

有聲學序

據己酉
志纂

劉漢玉 劉誠

漢玉性醇謹動必依禮日訓里鄰以敦行傾聽者輒數十

人誠和易謙恭為鄉黨望事親曲盡色養

據己酉
志纂

崔錫命 趙廷賓

錫命兩事繼母委曲承順無稍違待異母弟無閒言尤能植躬勤學廷賓醇謹好禮耄年勤學訓士多所成就子三均入太學錫命廷賓皆諸生

據已酉志纂

張萬貴 馬定清 祖文炳

萬貴定清文炳俱諸生好贍人困族黨有不能婚葬者罄

貲周之邑令張旌萬貴門

據已酉志纂

姚祥兆 姚久安 姚汝智

祥兆太學生繼叔父後母老病痿與妻子分直侍晝夜歷久不懈嫂早孀兆周卹以完其節久安字晏如年十三遭父喪暗泣溼袖不令母知前輩多奇之及長謹身奉母汝

智字視遠與弟汝賢字伯一俱太學生伯仲相友愛子姓
凡九人雍睦如同胞比鄰幾不能辨爲伯仲所出

據己酉志纂

張悅 孫長壽 朱同升

悅家貧傭工養母母所嗜多方羅致博歡且時喜躍母前
母歿儘力殯葬與儕輩晤好談孝親事長壽諸生性至孝
父母歿均廬墓日夜涕泣一夕羣狼擲戶外廬草盡墮忽
若有逐之者狼去得無恙同升貢監生年十一喪父事繼
母孫以孝著

據己酉志纂

遂燦 張三聘

燦賦性慷慨康熙六十年歲饑鄉人避地謀生燦睹之惻

然出藏金數百分給村眾各書券作質燦付一炬邑令
張旌其門子公輔亦負時譽同時張三聘者載粟一舟往
來營販約值四百金至儀封值歲奇荒紛紛出貨並折券
不復求償三聘諸生

據己酉
志纂

趙質中

質中庠生豪爽多義行族有少寡守節者以貧故無與承
嗣質中贈田數十畝爲立繼請旌歲饑族有鬻女爲人妾
者急出貲贖還別擇媾厚廩遣嫁

據己酉
志纂

張炳 董蘊 路應元

炳蘊俱太學生好義舉炳以王莊渡口當鞏偃衝施地六

畝修橋以濟行旅蘊施田十畝設茶亭以飲啜者應元爲
人謀灌溉之利嘗浚玉泉於南山修橋鑿路屢行不倦

據

西志
纂

康克明 崔克和

克明親卧病久惡井水味日往三里外取甘泉數年不倦
弟早世遺孤三撫之成立克和因破產勞瘁二十餘年撫

育遺孤如克明其他善事尤夥兩人皆諸生

據己酉
志纂

雷召純 路國正

召純家貧好義撫二甥成立調郵鄉鄙老而不倦國正監
生歲歉嘗出粟貸鄉折券不求償有桀黠犯之擯不與校

據己酉

志纂

李綦弟 荷

綦太學生好學能文數奇不遇與弟廩生荷終身友愛互

相切磨荷學亦有根柢

據己酉志纂

張馨三 馬賓王 張之祥

馨三字子參與賓王均諸生之祥恩貢生孝友家庭教授
生徒成就甚夥賓王尤嗜學訓士主嚴年八十餘手不釋

卷

據己酉志纂

馬渭 馬和祥 馬和榮

渭監生克盡孝友遇貧之喜貲助無德色族中和祥和榮

兄弟亦以樂施稱

據己酉志纂

牛奇生 李廷偉

奇生天性醇篤事母備色養而侍疾尤謹恆數日不解帶
廷偉母歿悲痛嘔血絕而甦者再事繼母亦得歡心

據己酉志

纂

焦鶴年 父 克讓

鶴年字介眉堤東村人乾隆戊子舉人父克讓諸生性篤
孝怡怡色養始終不倦鶴年性謙和有介操與人接温煦
若無聞而中實淵雅與修邑乘非公事不入官署人不敢
干以私族某以訟事浼求鶴年婉拒之其人出袖金立怒

出之時多應挑選得美仕鶴年儀容豐偉恰入彀人勸其
應選不赴一時服其高尚

據己酉志
採訪稿纂

胡芊秀

芊秀字雨山學者稱東谿先生居瑤嶺乾隆壬子副貢祖
父兩世皆重儒術芊秀英異內涵而外和厚讀書斬心得
以身體力行爲本見聞雖博圭角不露時河朔張生馨主
東周書院邑名士孫枝榮孫同然孫文沼咸從遊芊秀往
謁生馨目送之曰楊龜山蔡元定復見於今日矣文沼曰
不見雨山不知吾輩有筆墨痕同然曰與東谿語洗我塵
埃數斗枝榮曰文體之粹詩味之醇藹然有真儒風同邑

張其章張燮俱以鴻文傑品名噪公卿閒與芊秀交奉爲
畏友晚得教職以衰老辭設教鄉里前後四十餘年炙其
光者往往虛往實歸著有東谿文鈔東谿詩鈔采訪

李友陶

友陶字景亮號蓮溪南河渡人乾隆丙午舉人少讀書多
妙悟爲文疎宕有奇氣詩亦灑脫自喜後訓導中牟以讀
書敦行垂教每課士節廉俸作獎門人以修脯進者不較
盈絀五載解組歸設帳石窟寺生徒蝟集文經指示悉有
法度訓中牟時邑令某以萬壽宮皇牌移慶私署友陶將
揭報邑令懼浼紳啖以金友陶曰渠但不妄舉足矣金胡

爲者又諸生某贄金拜門牆友陶婉拒之未幾某生構大獄求緩頰乃曰向不受汝餽正爲今日地耳無已勉爲一言及獄息某復益金踵謝卻如前友陶與同里張淩雲交最厚及病篤淩雲往省友陶備述終身行逕及志趨並祈轉告朋儕死後毋譽吾墓故其死也淩雲實錄以表諸衢友陶惇篤謹厚臨事不苟無事不可對人言著有大學中庸講義中牟縣志列名宦

采訪

張書紳

孫

鶴年

書紳字警心石灰務人端慤工詞章父病痿痺服侍惟謹累年不懈家居終日危坐于不釋卷子姓望而生畏無敢

議戶外人有過恍然若傷尸然未嘗一許其短崇尙樸素
族幼輩有服綺麗者嚴辭規正每自誦云身安茅屋穩性
定菜根香可想見其爲人矣孫鶴年采訪

鶴年字德長號牧村邑庠生禹州馬時芳教諭鞏縣以陸
王學提倡後進時當科名鼎盛罕志道者鶴年年二十三
往謁時芳刮目相待力爲啟牖一席之談豁然夢醒遂受
業焉歸對書面自呼云鶴年鶴年亦欲受用乎向者裏來
自此學求心得以躬行實踐爲主事父母左右色養兄弟
之間歡洽無閒交友直諒每出規戒語令人骨悚而情意
藹然歷久彌篤家貧窶至不得已時輒喚奈何由是淘鍊

於困苦中裨益身心者良多久之自悟所得乃喟然曰天之待我誠厚也歿年四十二歲

采訪

劉瑞律

太高祖

玉璽

瑞律字協六號鏡洛拔貢生劉蘇村人玉貌長身敦敏朗爽孝友出諸自然家中費遇人有急輒傾囊無吝色教諭馬時芳以道學倡後進從遊十年能得其體要時芳卒於官貧無以斂瑞律醵同人爲具喪葬資躬自銜哀扶柩送至家道光丁酉肄業成均暇則授徒積三年館金刻時芳所著四家輯語暨風燭學鈔又與同志刊馬氏心書行世後交河內李棠階攻錯益堅教職待銓連奉父母諱遂

絕意進取設帳代耕四壁蕭然泊如也其學以務實爲宗
求道之勤改過之勇超絕一時晚年喜靜坐不事著述咸
豐辛酉以團練功保舉知縣未幾瑞律卽歿邵松年載續
輜軒博紀太高祖玉璽采訪

玉璽字藍玉號文靜振貧困設義塾所居與偃師壤接出
金買路名劉公衢行者便之據己酉
志纂

馮安常

安常字敦五號樸園歲貢生蔡莊人幼慧早補諸生喜講
身心性命之學與同邑劉瑞律張鶴年互相砥礪訂昆弟
交道光丁亥禹州馬時芳教諭鞏縣與安常語大悅安常

師事之每聽講輒覺心醉里塾距學署三十里有疑義徒步往質乙未鄉試報罷年三十三乃謝卻科名毅然以聖學爲歸於師生常例外另執贄於時芳剴切求教時芳亦厚遇之學養兼修每從寂感之交反而自求其本心磨練既久行無不慊憬然曰嘗得一分苦尋得一分樂學道何負於人哉安常內行肫篤動必循禮一出入必謁祠每春秋必省墓終其身不少倦其教人也隨資質高下造詣淺深借書旨啟牖本心從遊之士類能奮迅感發注重實行中年家益落餽粥恆不給安常處之泰然不以介懷咸豐癸丑粵軍蒞鞏有少年隨之去及歸衆少年欲殲旃安常

詳爲解釋事得寢辛酉七月擒匪擁衆犯境安常與族人
避居青龍山相從者百餘家安常令掘洞鑿池整頓武備
匪至無敢犯居常黎明起整襟危坐隆冬盛暑未嘗有惰
容晚年涵養益粹取先儒語輯爲兩卷曰要言曰庸言又
有論語輯說及猛省錄二卷河南學政邵松年載輶軒博

紀采
訪

王嵩生

嵩生字中峯七里舖人性沈毅別具風骨其奇節往往出
人意表幼失怙家貧隨從父營船業司賬簿青浦胡太史
某攜眷南歸道彭城賃嵩生船太史與語知其非常人刮

目待之嵩生抱知己感途中爲太史謀者無弗至嗣受妻
子之託另覓舟以送達青浦爲約中途遇寇警百計營護
始獲安全抵家而身履虎尾者數矣太史深感之推爲國
士留之家令教兒童每外出輒以家務見託嵩生披肝瀝
膽絲毫不苟如是者三年後北歸安貧勵志刻意讀書前
後設教數十年縣名宿賀筠張起元等多與之交閒以諧
語作爲詩歌人多傳誦先是嵩生聘李氏爲婦李氏獷悍
婦姑勃谿數戒不悛欲出之母弗許後卒以不遜致母病
病旋死嵩生飲恨於中一時未便發難某年患嘔血恐一
旦溘逝遺恨莫洩乘李不備數其罪手刃之焚香告母主

旋自首知縣堂訊數次始終以報母仇爲辭辭氣昂然堂上爲之改容案遂終結綜嵩生生平有三載送友十年讀書一日報母諸大端類皆偉男子事不蹈恆蹊而善氣迎人親於骨肉獨於日用倫常閒自有鐵石心腸橫撐直拄不隨流俗波靡其殆古之豪俠歟

采訪

梁檀

檀字月亭號拙翁縣學生石關人性純篤天真爛熳迭從劉瑞律賀致章遊多所領悟咸豐癸丑粵軍入鞏陷洛北檀父承周弟鶴亭皆遇害檀亦受鉅創將殉父以終母氏泣勸乃日咽米汁少許延餘生母病痿痺飲食浴溲檀曲

意承奉歷久不衰及母喪自含歛以至禫祭皆如禮凡習俗誦經禮佛事一概擯絕鄉里惡俗信陰陽家言有出魂返煞等說誤觸之必懼殃咎往往初喪未歛舉家委尸逃避檀力駁之至今梁氏合族無效尤者家不中貲而性好施予光緒丁丑歲大饑檀破產度荒餘力沾丐族親有族媪貧且病孤無依檀日餽兩餐後媪卒躬率族人葬之生平喜讀近思錄終日整齊嚴肅端坐如塑而胸懷恬適生

機盎然

采訪

賀致章子筠

致章字含之號審齋歲貢生洛北人生性純篤不喜紛華

少從李孝廉友陶遊致力經史爲文矩矱先民一以理法
爲宗蚤入邑庠聲名藉甚以明經終道光丁酉應秋試赴
汴聞母張病兼程歸抵家已無及因痛自劾責絕意進取
事父益謹父年耄步履多艱致章撰杖以從依依如孺子
父卧病委曲侍奉喪葬皆盡禮弟致瑞已故乏嗣以次子
繼且經紀其喪俾無缺咸豐癸酉粵軍臨境村衆悉竄致
章抱歷代木主危坐高阜神色自若軍退還主於祠如虞
祭禮生平耿介拔俗重內行輕科名立身持已尺寸不苟
卒年六十有九子筠采訪

筠字猗園縣諸生性莊嚴讀書志趨高尚近承家學遠追

古訓刊落浮華不斤斤於占畢遇事必印證古先期歸於
當居父喪哀禮並盡葬畢攜弟策廬墓及策逝撫兩從子
盡情育誨丁丑歲饑筠割畝求活仍分潤於親友與王嵩
牛張啟元交善一日啟元云君吉貝豐穫可衣被故人筠
諾之後果以吉貝餽啟元曰曩特戲言耳不圖吾友踐言
如此生平不事諧謔人有過面折之遇為善者則又惻惻
款款頌慕不已殆所謂直而溫剛而塞者歟采訪

李卜周

卜周字永年郡庠生學者稱羅灣先生涉村人抱經自娛
不務聲聞廣蒐歷代儒先著述實力探討且殷殷為後進

勗曰學宋儒而僞無寧學漢儒而真也一時從遊者咸知尊經一洗空膚之陋其卒也劉潛銘其墓

采訪

孫同然 祖樹烈子 重三

同然字聖符歲貢生羅莊人祖樹烈諸生力學敦品友教汝蔡聞遂平李柱石慎許可推爲古之學者同然生性敏達博聞強記與人交肝膽相照酷嗜學無間寒暑學問淵博卓出一時手錄古今載籍甚夥所撰金石文字識者謂有史漢風歲庚子江布政檄全省舉文行兼優之士邑令陳以同然應選幾經愆悞乃承可著有水經注考證深柳堂詩草其子重三字欽之亦好學能詩所著詩文集已散

佚據已酉志
采訪稿纂

孫文沼父朝傑 兄子會甲

文沼字青藜乾隆己亥舉人居羅莊父朝傑樸誠孝友務踐所學文沼性方嚴取與不苟績學為文力拔時俗與羣從枝榮同然互相觀摩後從張生馨學古文所造益深同里劉潛極稱之著有青藜遺稿兄子會甲增生精詩文於易尤有心得據已酉志
采訪稿纂

劉文英父懷瑾 弟文豹

文英字毓華號石渠侯地人父懷瑾事繼母孝能詩文喜著述文英舉乾隆辛卯鄉試辛丑大挑一等以親老改教

諭夙嗜學日與密友討論不懈每夕就寢檢點日間所爲
遇有過失卽刻厲自責歷署原武濟源新鄉禹縣教職初
至原武前任某停柩文英資助歸里士林佩之邑侯李述
武修縣志延任採輯弟文豹字仲蔚刻苦求學尤愛朱子

語類

據已酉志
采訪稿纂

康樞 子中掄 玄孫 誥

樞邑庠生康溝人姊適閩婦貧乏嗣樞體親心以成姊之
節康熙歲饑樞出粟賑鄉鄰子中發增生中掄字少川庚
子舉人中掄天性純篤父亡後專力奉母教諭鄢陵訓士
先行後文士論翕然解任囊無餘金玄孫誥 據已酉志
采訪稿纂

誥字子封號梅村乾隆戊申舉人少孤貧母曹矢節教養質衣廩以助學誥志趨遠大傲骨嶙峋肫肫於立身行道冀紹家學事親之誠時流溢於墨楮行誼所被鄉人至今傳頌著有擬歷史樂府梅村詩集采訪

孫祚長弟祚泰孫發源

祚長邑增生羅莊人弟祚泰庠生伯仲相切劘亦師亦友

愛敬不替併知名河洛間據己酉志纂

發源字逢其號靜齋縣學生祚長孫賦性篤誠刻勵於學以文名一時孫氏多俊髦發源獨樹一幟好輯儒先語啟迪後進並鑽研羣經務求確解年八十餘猶兀坐吟誦采訪

王復伸兄復全子鳴鳳孫謨曾孫又曾

復伸字長公王家溝人兄復全字美公負耒養親煞具特
識晰義利若苗莠耆年無子傾橐鬻產任卹不違復伸性
豪爽八歲喪母事繼母勲懇周至讀書數年旋充戶吏赴
京考職授從九品以巡檢需次復伸宦情淡薄好行其德
從叔母貧不自給迎養於室舅氏耄而無依慨然身任族
兄田宅蕩盡亦割畝贍助喜交衣冠士族四方名宿至罔
不折節優禮敬愛如不及子鳴鳳字和聲邑諸生出後三
伯父孝養無異生親嗜學能文晚年創修族譜手訂成帙
汲引後進風流丕振從子謨采訪

漢字定之郡岸生砥礪廉隅取與不苟好讀書名聞一時
母閻晚病日出入扶持晨昏不離女弟家窶貧體父母志
極意周卹且出貲代贖舊產使免凍餒與人交無忤無爭
鄉里敬憚之弟閻字閔之性孝友寡言笑內精外樸制行
有法父兄所訓概欲施行執親喪毀甚竟至不起子又曾

采訪

又曾字景沂號嵩峯道光癸未進士性坦直不事修飾家
貧酷嗜學每於耕耘操作之際吟誦弗輟因膏油不繼又
於月下爐前映光照讀童時出語恆驚其座羣賦之以目
弱冠父邁沈疾服事惟謹左右趨蹌者十三月與弟友愛

曲至衣履財物泯爾我界道光壬午舉於鄉次年成進士
以母老虞遠違請改教職前後兩任汝寧教授同時兼主
書院時學校課士多視爲具文又曾勤懇倍至除讀書作
文外復訓以立身行道之方遇貧不能卒業者召之署中
飲食教誨歲壬辰汝南遭水災又曾謀諸縣令設粥廠以
拯災黎躬自督率全活甚衆大吏器其人欲保薦以蘄大
用又曾以材力不勝固辭北郭有學田百畝舊屬正學適
又曾奉諱去任副學某袖金求書契劃歸兩學又曾卻金
婉謝在任七年未嘗以事干縣令甚有長跪求爲一言者
終不之應後主嵩陽書院生徒多欽仰之立歿思碑

采訪

焦萬年 伯祖 侗 祖 倬

萬年字永傳號東籬廩貢生焦灣人伯祖侗增生讀書能
 窺奧旨與祖倬並以詩文鳴門牆濟濟萬年天資英敏學
 識宏博知縣陳某聘主東周書院講貫殷勤未幾陳某卒
 貧無以歸櫬萬年醵金助之歷署河陰鄆陵教諭所至有
 聲喜吟詩古體尤工如漢陵行催租謠贈曹肅諭五十韻
 尤膾炙衆口乾隆己酉修邑志分任採輯著有東籬文稿
 馬時芳爲之序

據己酉志
 採訪稿纂

席四銘

四銘字式丹侯地人生有夙慧剛直恥徇人嗜書如炙雖

屯蹇疾病不少懈初奉慈訓耕讀並操嗣病其不專乃一
志典墳文思由是大進室人役一婢四銘謂非儒家所宜
請母女之爲擇聳焉幼時孤苦族叔某憐而誨之四銘銘
心不忘族叔歿後拂拭其諸子時進逆耳之言再從兄鳴
岐客死陸渾四銘憫伯道無兒躬迎旅櫬爲之安葬與蘇
村邵某有葭莩誼洛水泛溢廬舍傾圮四銘出貲拯救奠
厥攸居嘉慶丁巳設帳某村居停王某將爲始祖表墓請
列宗圖以詳世系四銘以大宗居中稱嫡餘按昭穆分序
泐石訖越四載旁支某倏生異議欲改嫡爲長字糾衆毀
碑大宗某起訴自縣至撫院依次投牒案中牽四銘爲教

香果元卷 十一 一
三二

暖四銘以家禮應稱嫡對侃侃置辯吏不能屈郡守某以
甘言給之暗詳大吏結案並以褻衿罪四銘計此案因一
嫡字興訟數年經歷多級株連多人耗費多金四銘以一
字之是非跋涉拜謁僕僕訟庭不肯以弱骨易強項瓦全
易玉碎亦可以觀過知仁矣著有四書安十卷采訪

李愷

愷字友元號星齋舉乾隆乙卯鄉試清易鎮人幼聰慧讀
書具卓識名噪一時父年老祖母曹疾偏枯凡四閱寒暑
愷供養惟謹訓導閩鄉除課士子外捐俸補修書院生母
楊抱病里門愷得耗卽日解綬歸凡四晝夜奔馳六百餘

里一生恂恂謹飭無城府務實行不喜談名理卒年六十
有六遺著散佚采訪

李麟圖

麟圖字元閣舉嘉慶戊辰鄉試石關人精研經典丙夜不
懈與劉淩漢同師交莫逆歲己卯同赴禮闈值劉病且瀕
危同鄉多避匿麟圖左右周旋凡醫藥飲食之資躬自調
理經紀病賴以瘥道光丙戌大挑二等補山東武城縣丞
通判東昌府衛河廳所至有政績生平肝膽照人文章傳

誦一時采訪

劉士冠父國相子元方孫潤猷

士冠字傅一廩貢生北山口人父國相字枚卜監生家世
好義居常賙卹鄉里有族子貧無依出爲完婚生子同居
三世無間言士冠狀貌魁梧局量豁大家素饒喜濟人急
爲學於詩文外喜誦儒先學說姊適趙氏孀士冠存間饋
獻白首不衰爲宗祠施祭田並備一切什器以肅祀事異
鄉過客告困者靡不加意賙卹乾隆丙午嘉慶癸酉兩次
歲饑出粟振濟全活綦夥鞏東南二十里有孔道敗於水
行人苦之士冠捐貲築橋遠近稱便子元方據己酉志
採訪稿纂
元方字端甫廩貢生候選訓導少承家學迭事名師恪修
儒行嘗客洛陽有昆季某爲百金故詆訟累年不解元方

廉得其詳出爲調解事遂寢嗣某等旋里昆季均自翊得勝語言傳久漸生疑竇及雙方印證乃悉金從外來某等深自愧悔各蠲前忿並齎多儀及原金謁元方於里第子

潤猷

采訪

潤猷字允升候選鹽運司知事累世素封德惠周洽潤猷夙承彝訓藹然孝友姊適神堤馬家凋零潤猷迎歸同居爲甥延師課讀適曹孀姑勵冰操有年潤猷奉與同爨其姪婦孀貧亦招與姑居凡所以慰慈帷也道光二十七年歲大饑出粟振貸咸同閒捻匪驛騷督衆築砦勸設義塾鄉衆謳頌其他建試院修文昌宮村南十方院隨在布施

姚元之試士河南歎爲奇才爲人規模謹嚴而情懷溫煦
門下多知名士兄清棟字松丸縣學生學務實行不事浮
華居恆衣冠必正經先人邱墓必揖容貌不莊者望之卽
避去與清字壘簾最篤卒後門人私謚曰誠端

采訪

孫循

循字于理號葵園舉道光丙午鄉試羅莊人賦性耿介落
落寡合自信天道好還所居室名畏還齋侍父病有呼輒
應父曰汝竟夕未眠乎待人薰然以和遇貧窶量力周卹
晚年設帳於鄉村南寨有花木竹石之勝門生積貲購地
日夕講論其中時稱爲南寨先生

采訪

崔嵩喬

嵩喬字煦村縣學生白沙人有瀟灑出塵之概博學能文詩尤卓然名家於白香山袁簡齋爲近其得意處往往不減太白爲人寬平少機械輕財好施中年家益落瓶粟屢斷又抱西河之痛嵩喬處之泰然讀書談道以自樂卒年五十四著紅香亭詩集若干卷

采訪

趙廷瑛

廷瑛字修五號書圃舉嘉慶庚午鄉試蘇村人少具卓識日用倫常閒概具真性下帷攻苦德業日著尤喜成就寒畯門下有英才坎坷者恆代供膏火道光己丑教諭西平

課士手爲批刪風聲所播鄰邑遠來執贄一時稱盛其官
雖冷落確有表見去後士子猶追頌采訪

李夢蛟

夢蛟字騰九道光癸卯副貢蘇村人外樸內慧具風骨師
事孝廉曹肅論肅論極稱之知縣朱光岩高其品屢請不
至朱解任時贈以詩主講邑西白鹿書院卒年八十餘著
有大中釋義二卷正情詩集一卷浚源文集若干卷采訪

李桂齡

桂齡字薌谷號寬侯舉道光辛卯鄉試涉村人德器深厚
刻意墳籍詩文冠冕一時不隨流俗轉移咸豐癸丑大挑

二等訓導襄城捻匪數次入境桂齡策畫防衛悉中肯綮
並提劍晝夜梭巡城池賴以無恙中丞英某黃某遞獎勤
勞保授兵部主事荐晉郎中晚歲傲岸峻厲碑銘諸作不
肯輕掖一字或謝弗作馬時芳稱其志氣識力超越等倫
非虛也訓襄城十七年著有知足軒詩集

采訪

魏多彩 子 樞弼

多彩字中素增生塢羅人孝繼母愛弱弟譽重一時爲人
倜儻多才排難解紛所居一帶訟爲之稀有田三十餘畝
析爨時盡數讓弟母居弟宅遇嘉節必潔以奉子樞弼
樞弼字紫垣舉道光庚子鄉試敦崇古處學期實用藉資

采訪

名師益友攻錯自厲禹州馬時芳嘉之屢施啟牖驅逐
漸領悟端正趨嚮鞭辟近裏視聳貌如也從此內養神
明外修名節爲鄉里所矜式

采訪

李百從

百從字令一歲貢生上莊人少致力於經史百家未冠補
諸生提學俞目爲國士贈箴題詩特加褒寵顧數奇未克
上達爲人爛熳天真灑脫自喜一生設帳日多不以心爲
形役時論高之

采訪

符焯

焯字見三號靜軒道光乙未舉人居石灰務樸素無嗜好

規步繩趨言動不苟早歲攻苦及長以儒先賢哲爲矩矱
立身行己無少逾越五十七歲領鄉薦一度春官卽杜門
不出專以裁成後學爲己任凡奔走干謁及一切玷名污
節之事絕口弗道年八十餘卒嘉言碩德至今人豔稱之
采訪

崔鳴山

鳴山字漢封號西樓舉道光甲午鄉試居白沙生具異稟
文名噪甚長老多稱之甲辰大挑二等教諭靈寶殷勤啟
牖多士仰爲矩範采訪

焦壘

壘字玉亭增貢生張嘴寒人少嗜學刻苦自勵於倫常閒
委曲周摯訓子姓納身軌物嗣教諭武陟躬行實踐以身
作則文風丕振時李棠階主講河朔書院壘爲監院後解
組棠階製錦榮行許以學粹品端爲人坦白易直卹困周
貧晚年逍遙物外日手一編終壘世鄉無訟獄采訪

丁元薰子以靜

元薰字蓮舫歲貢生柏溝人聰慧嗜書遇拂意時輒披卷
朗誦以自解及長博聞強識腹笥便便爲文如萬斛泉不
擇地而湧師事教諭馬時芳蜚聲藝苑知縣袁修翰聘主
東周義塾來遊者舍不能容咸豐辛酉捻匪東來弟履謙

率鄉團防堵仙家店元薰布置指揮得免於難由明經敘
教職教諭伊陽鞏城東南岡陵重複其俗重厚少文元薰
澤以詩書由是科名蟬聯文教日啟所著有詩文集子以
靜采訪

以靜字子山生性謹愿悃悃無華兄弟五以靜以白眉稱
舉同治癸酉鄉試應大挑選禹州學正勤慎儉廉不染宦
場結習與兄弟析爨時所有田產資財牲畜器皿等盡數
推讓僅留住宅一區諸昆弟病其獨薄益以蔬圃後從子
某生計窘促出爲購田十畝以養之采訪

崔嵩華

嵩華字蓮峯號誠齋歲貢生白沙人父金榜篤學不遇嵩
華就傅後仰體親心晝夜攻苦以貧故幾輟業乃努力弗
懈於叱犢中仍摩挲簡編父憐其志拮据供之學識日深
造遂知名喜講性命之旨著有翊志□卷馬時芳稱爲後
來之秀

采訪

閻梅

梅字松友羅口人風度端凝言笑不苟弱冠補諸生屏居
山中鍵戶攻苦旋出而從師聞見益擴聞新鄭王鈇以道
學倡後進往受業及歸潛心於儒先語錄藉自針砭生平
神清氣定不立崖岸教子弟以收放心養德性爲基治家

各責以正業無私蓄無諛語食指雖繁而生計不窘項城
王誥桂經濟冠一時少所許可及見梅爲之心折捻匪肆
擾梅與狄坦同修山砦地方賴以保全著有詩文集畧兩

卷

采訪

